

# Аллоҳдан қўрқиши ва сабр қилиши | Сийрат дарслари (279-дарс)



19:00 / 26 апрель 1018

411. Анас розияллоҳу анҳудан ривоят қилинади:

«Набий соллаллоҳу алайҳи васаллам бир қабр олдида йиғлаб ўтирган аёлнинг ёнидан ўтаётуб, унга: «**Аллоҳдан қўрқ ва сабр қил**», дедилар. «**Нари тур! Менга етган мусибат сенга етгани йўқ!**» деди у. Аёл у зотни танимаган эди. Унга: «**Халиги одам Набий соллаллоҳу алайҳи васаллам эдилар**», дейишди. Шунда у эшиклари олдига келди, у ерда эшик оғаларини кўрмади ва у зотга: «**Сизни танимабман**», деди. Шунда у зот: «**Албатта, сабр биринчи зарбададир**», дедилар».

*Бухорий ва Муслим ривоят қилишган.*

412. Умму Салама розияллоҳу анҳодан ривоят қилинади:

«Расулуллоҳ соллаллоҳу алайҳи васалламнинг: «**Қай бир бандага мусибат етганда Аллоҳ унга амр қилган нарсани - «Иннаа лиллаҳи ва иннаа илайҳи рожиъуун» деса ва сўнгра «Аллоҳумма ажирни фий мусийбати вахлуф лий хойром-минҳа» деса, Аллоҳ унга албатта ажр беради ва унга бунинг ўрнига яхшироғини беради**», деганларини эшитдим. Абу Салама вафот этганида ўзимча: мусулмонларнинг қай бири Абу Саламадан яхши (бўларди), Расулуллоҳ соллаллоҳу алайҳи васалламга ҳижрат қилган биринчи оила бўлса, дедим. Сўнгра Расулуллоҳ соллаллоҳу

алайҳи васаллам менга амр қилғанларидек (истиржоъ) айтдим. Аллоҳ менга унинг ўрнига ундан яхши зотни – Расууллоҳ соллаллоҳу алайҳи васалламни берди».

Расууллоҳ соллаллоҳу алайҳи васаллам менга Ҳотиб ибн Абу Балтаъани ўзларидан совчи қилиб юбордилар. Шунда мен: «Қизим бор ва (ўзим) рашкчиман», дедим. **«Аллоҳга уни қиздан беҳожат қилишини ва рашкни кетказишини сўраб дуо қиласиз»**, дедилар.

*Муслим ривоят қилган.*

413. Зайнаб бинт Абу Саламадан ривоят қилинади:

«Набий соллаллоҳу алайҳи васалламнинг жуфти ҳалоллари Умму Ҳабибанинг олдига кирдим. Ўшанда унинг отаси Абу Суфён вафот этган кунлар эди. У сариқ рангли аралашма ёки бошқа хушбўй нарса келтиришларини сўради. Ундан бир қизчага суртиб кўрди-да, кейин ўзининг икки юзига суртди. Сўнгра: «Аллоҳга қасамки, ҳозир хушбўй нарса суртадиган ҳолим йўқ, аммо Расууллоҳ соллаллоҳу алайҳи васалламнинг: **«Аллоҳга ва охират кунига иймон келтирган аёлнинг бирор майит учун уч кундан ортиқ аза тутиши ҳалол эмас. Фақат эрига тўрт ойу ўн кун тутади»**, деди».

*Бухорий ва Муслим ривоят қилишган.*

Бошқа ривоятда:

«Зайнаб айтди: «Зайнаб бинт Жаҳшнинг олдига акаси вафот қилганда кирдим. У хушбўй чақирди, сўнг ундан суртди. Сўнгра: «Аллоҳга қасамки, ҳозир хушбўй нарса суртадиган ҳолим йўқ, аммо Расууллоҳ соллаллоҳу алайҳи васалламнинг минбардан туриб: **«Аллоҳга ва охират кунига иймон келтирган аёлнинг бирор майит учун уч кундан ортиқ аза тутиши ҳалол эмас. Фақат эрига тўрт ойу ўн кун тутади»**, деганларини эшитганман», деди».

*Бухорий ва Муслим ривоят қилишган.*

### ***Расууллоҳ соллаллоҳу алайҳи васаллам» китобидан***

Ушбу китоб Ўзбекистон Республикаси Дин ишлари бўйича қўмитанинг 2022 йил 30 ноябрдаги 03-07/9078-рақамили хulosаси асосида чоп этилган.